

CARTA JA NI NTEE SAN PABLO APOSTOL NUU NCHIVI GALACIA

1 ¹Maá nī cúu Pablo apóstol. De nsūú nchivī ní jáni nduhū, de nī nsūú nchivī ní ntétíñú nduhū jā nácani nī tūhun, chi sa maá Jesucristo jíin Tatá ó Yāā Dios, Yāā jā ní nastécū Jesús mähñú ndīyi.

²De nduhū jíin ndācá hermano jā íyó jíin nī yáhá, té nī carta yáhá cuēē nūū ndá ndóhó nchivī cándíja níi región Galacia.

³De ñúhún inī ndá nī jā Tatá ó Yāā Dios jíin Jētohō ō Jesucristo, ná sáhá cā yā jā váha ndá nú, de sáhá yā jā coo ndeé coo siī inī nū.

⁴Chi Jesús nī nsōcō yā maá yā jā ní jīhī yā jā síquī cuāchi ó, tácu scácu yā yóhó nūū ndācá jā nēhén jā íyó ñayiví yáhá, chi súcuan nī jētahān inī maá Tatá ó Yāā Dios.

⁵De ná cáhān ō jā viī ndasí cúñáhnú yā níi cání. Súcuan ná cóo. Amén.

Siquī jāá nduú cā nā incā tūhun jā cācu nchivī

⁶De sáhvi inī nī ndéhé nī jā ñamā ndasí ndúcú ndá nú sndóo nú Yāā Dios, Yāā jā ní ncana ndá ndóhó jā quīvi nú ndahá yā siquī jā ní ncundáhvī inī Cristo yóhó. Chi nī niquīn ndá nú incā tūhun jā síin cáhān.

⁷De nduú cuitī cā nā incā tūhun íyó jā cācu ó. Sochi íyó jacū nchivī jā stáhān ji ndá ndóhó, de cúnī ji nasāma ji tūhun nāsa scácu Cristo yóhó.

⁸De tú iin nchivī nacani incā tūhun nūū nū jā nāsa scácu yā ndóhó, de tú nduú quétáhān jíin tūhun jā ní nacani ndá nī nūū nū xihna cā, de ná tánū tāhvī nchivī ñúcuán. De vísō ndá nduhū á iin ángel jā quiji jondē andiví nacani incā tūhun, de ná tánū tāhvī.

⁹Ja nī ncāhān nī jíin ndá nú, de sunī súcuan cáhān tucu nī mitan: Tú nā-nī tēe nacani incā tūhun nūū nū, de tú nduú quétáhān jíin tūhun jā ní jetáhvī ndá nú, de ná tánū tāhvī dē túsaá.

¹⁰De jā cáhān nī súcuan, ¿de á ndúcú nī jā cuetúhún nchivī nduhū, á Yāā Dios? ¿A ndúcú nī jā cusīi inī nchivī jíin nī, jáni inī ndá nú? Nduú chi tú ndúcú cā nī jā cusīi inī nchivī jíin nī, de nsūú mozo Cristo cúu nī túsaá.

Nāsa nī nduu Pablo apóstol

- 11** De cáchī tūhun nī nūū ndá nú, hermano, jā tūhun jā scácu yā yóhó jā nácani nī, chi nsūú jā ní jani inī maá nī jín ndá cā nchivī cúu.
- 12** Chi nsūú nchivī ní stéhēn nūū ni, de nī nsūú nchivī ní nsáhá jā ní ncutūha nī, chi sa maá Jesucristo nī stéhēn nūū ni.
- 13** Chi ja nī jini ndá nú tūhun nāsa nī nsáhá nī jondē saá, tá nī nchiñúhún nī sähān ndá táhān nī hebreo. De jínī ndá nú jā ndasí nī nsáhá nāvāha nī nchivī jā cándíja nūū Yāa Dios, de nī ndihvī inī ni jā snāa nī ji nícu.
- 14** De vāha cā nī ncutūha nī sähān ñúcuán nsūú cā cuāhā cā tēe nación ni jā ní jahnu jín nī, chi nī ndihvī cā inī ni sīquī ndá jā ní jaquín ndá tatā nī.
- 15** De vísō sūcuán de Yāa Dios chi ja nī nacāji yā nduhū jondē tá ncháha ca cacu nī. De iin quivī nī ncusiī inī yā nī ncana yā nduhū jā quivī nī ndahá yā sīquī jā ní ncundáhvī ndasí inī yā nduhū.
- 16** De nī stéhēn yā Sēhe yā nūū ni, tácuā nacani nī tūhun nāsa scácu yā nchivī ndācá nación jāá nduú jínī tūhun yā. Ñúcuán de nduú ní jícā tūhún nī ni iin nchivī,
- 17** de nī nduú ní jēhēn ni Jerusalén nūū ndá tēe cúu apóstol xihna ñúhún cā nsūú cā nduhū. Chi sa nī jēhēn ni jondē región Arabia, de sá de nī nōhōn tucu nī ñuū Damasco.
- 18** Ñúcuán de jondē nī ncháha ūnī cuiyā, sá de nī jēhēn ni Jerusalén. De nī jini nī nūū Pedro, de nī ndeē nī jín dē xāhōn-ni quivī.
- 19** Sochi nduú ní jínī ni nūū ndá cā apóstol, chi nūū mátúhún-ni Jacobo ñani maá Jētohō ō.
- 20** Tūhun yáhá jā tēe nī cuēē nūū ndá nú, chi jínī Yāa Dios jā ndāa cúu.
- 21** Ñúcuán de nī jēhēn ni ní región Siria jín Cilicia.
- 22** De ndá nchivī cándíja jā yíhí ndahá Cristo, jā ndēē región Judea, ncháha ca cunī cuitī ji nūū ni saá.
- 23** Chi vāchi tūhun nī-ni nī jini ji jā cáhān nchivī: Tēe jā ní nsáhá nāvāha yóhó jondē saá, de mitan chi nácani dē tūhun jā cándíja ó jā ndúcú dē snāa dē saá, ncachī.
- 24** De nī ncāhān ji jā cúñáhnú ndasí Yāa Dios jā sūcuán nī nsáhá yā jín nī.

Jā ní jetáhvī ndá cā apóstol jā cúu Pablo apóstol

- 2** ¹ Ñúcuán de jondē nūū úxī cūmī cuiyā, de nī jēhēn tucu nī Jerusalén jín Bernabé, de suni nī jeca nī Tito nī jēhēn ni jín dē.
- ² De nī jēhēn ni chi maá Yāa Dios nī stéhēn yā jā jini ñúhún quihīn ni. De nī ndutútú sín ndá máa-ni tēe cúñáhnú nūū nchivī cándíja. De nī ncachī tūhun nī nūū ndá dē sīquī tūhun jā scácu yā yóhó jā nácani nī nūū nchivī ndācá nación jāá nduú jínī tūhun yā. De sūcuán nī nsáhá nī tácuā cuetúhún

dē jā sūcuán tiñu sáhá nī, de tácu mā quéndō cāhá tiñu jā sáhá nī jín jā ní nsáhá nī.

³De juni nduú ní nsáhá fuerza ndá dē Tito, tē jā ní jica jín nī, jā cundē tunī circuncidar dē, vísō cúu dē tē incā nación de nduú ní ncúu dē circuncidar.

⁴De sūcuán nī ncundaā, vísō nī nquīvi jacū tē stáhvī jā sáhá dē jā hermano cúu dē. De ndá tē ñúcuán nī nquīvi dē tácu cundēhé yuhū dē nāsa nī nduu libre ō nūū ley circuncidar sīquī jā yíhī ó ndahá Cristo Jesús. Chi cúnī ndá dē jā squíncuu tucu ó ley ñúcuán, de nduu tucu ó mozo nūū.

⁵De nduú ní jétáhvī cuitī ndá nī nūū ndá tē ñúcuán, chi cúnī nī jā quendō nīhin ndá nú jín tūhun jā scácu yā yóhó.

⁶De ndá tē ñúcuán jā cúñáhnú nūū nchivī cándíja, nduú cā nā incā tiñu jée ní ndácu dē nūū nī. De maá nī chi nduú ní nsáhá nī cuenta jā cúñáhnú dē, chi Yāā Dios suni nduú sáhá yā cuenta, chi inuú-ni cúu ndiviī tē nūū yā.

⁷Chi sa nī jinī ndá dē jā tūhun jā scácu yā yóhó, ndíso tíñu nī jā nácani nī nūū nchivī ndācá nación jāá nduú sáhá circuncidar, tá cúu nūū nácani Pedro tūhun ñúcuán nūū nchivī hebreo jā sáhá circuncidar.

⁸Chi Yāā Dios jā ní ntetínú Pedro jā nácani dē tūhun nūū nchivī hebreo, suni maá yā nī ntetínú nduhū jā nácani nī tūhun nūū nchivī ndācá nación jāá nduú jínī tūhun yā.

⁹Jā ñúcuán, Jacobo jín Pedro jín Juan nī jinī ndá dē jā ní ntaji Yāā Dios tiñu váha ndasí yáhá nūū nī. De ndá tē ñúcuán chi cáhān nchivī cándíja jā maá dē cúu jā cúñáhnú cā. De nī ntiin ndá dē ndahá nī jín ndahá Bernabé, jā stéhēn dē jā íyó mānī dē jín nī, jín jā ní ncundaā inī dē jā ndúū maá nī quihīn nacani tūhun nūū nchivī ndá cā nación, de ndá máá dē nūū nchivī hebreo.

¹⁰De iin-ni jā ní jīcān dē cúu jā nūcūhun inī ndá nī jā chindeé nī nchivī jā ndóho ndáhvī, de tiñu ñúcuán chi suni ndíhvī inī maá nī sáhá nī.

Jā ní ncāhān Pablo nūū Pedro

¹¹De tá nī nquiji Pedro ñuū Antioquía, de nī ncāhān cājī nī nūū dē, chi nī stívī dē tiñu.

¹²Chi jondē ncháha ca quenda sava táhān dē hebreo jā ní ntají Jacobo, de yājī dē stāā jín nchivī jāá nsūú hebreo cúu. Ñúcuán de tá nī nquenda ndá tē ñúcuán, de nī ncusín dē jāá nduú cā yājī dē jín jī, chi yúhú dē jā cunī ndá tē ñúcuán jāá nduú cā squíncuu dē ley ndá táhān dē hebreo. Chi cáhān ley jā má cūú cājī dē stāā jín nchivī jāá nduú sáhá circuncidar.

¹³De sava cā tē hebreo jā cándíja, suni nī ncuijiyo dē nūū jī, tá cúu nūū ní nsáhá Pedro, chi yúhú dē jā cunī ndá tē ñúcuán. De jondē maá Bernabé nī scāhān ndá dē, nī ncuijiyo dē.

14Ñúcuán de nī jinī ni jā ní nayūhú ndá dē jā cajī dē stāā jín nchivī ñúcuán, de súcuán cúu jāá nduú cā jīca dē jín modo jā cáhān tūhun jā scácu yā yóhó. De nī ncāhān ni nūū Pedro, nī jinī jínúū ndācā dē: Ndóhó jā cúu tēe nación ō hebreo, nduú cā squíncuu nú ley táhān ó nchivī hebreo, chi yājī nū jín nchivī ñúcuán. ¿De nājēhē sáhá nú fuerza ji jā squíncuu maá ji ley táhān ó hebreo, de tú nduú squíncuu maá nú? ncachī ni.

Iin-ni modo scácu yā nchivī hebreo jín nchivī ndá cā nación

15De yóhó chi cúu ó nchivī hebreo, de cáhān ō jāá nsūú nchivī ndá cā nación jā sáhá cuāchi cúu ó.

16De vísō súcuán de jínī ō jā ni iin ó nduú quéndōo ndāā ō nūū Yāā Dios jā squíncuu ó tiñu jā ndácu ley Moisés janahán, chi maá-ni jā candíja ó jā Jesucristo sndáhvā yā cuāchi ó. Jā ñúcuán cúu jā suni maá ó nī ncandíja ó Jesucristo, tácu sndáhvā yā cuāchi ó sīquī jā cándíja ó, de nsūú sīquī jā ndúcú ó squíncuu ó ley. Chi cáhān tutū īī: Nī iin nchivī mā quéndōo ndāā ji nūū Yāā Dios jín jā ndúcú ji squíncuu ji tiñu jā ndácu ley, cáchī.

17De ndá máá ó nchivī hebreo, tú cúnī ō jā sndáhvā Yāā Dios cuāchi ó sīquī jā ní jīhī Cristo jēhē ō, suu cúu jā jícūhun inī ō jā suni nchivī sáhá cuāchi cúu ó, tá cúu nūū cúu ndá cā nchivī. ¿Túsaá de á cuāchi nī nsāhá ó jā ní sndóo ó ley janahán tá nī ncandíja ó Cristo? Nduú cuitī jā súcuán.

18Chi sa tú naquehen tucu nī ley jā ní sndóo nī ñúcuán, de suu sáhá jā nenda cā cuāchi sīquī ni.

19Chi modo ja nī jīhī ni nī nsāhá ley, de jā ñúcuán mā cūú cā ndacu ley nūū ni. De súcuán de cuu cutecū ni jā sáhá nī jā cúnī Yāā Dios.

20Chi modo jā ní jīhī ni yīcā cruz jín Cristo, de mitan chi nduú cā tēcū ni jā maá nī, chi maá Cristo cúu jā tēcū inī ni. De jā tēcū ni inī ñayiví yáhá mitan cúu jā cándíja nī jā Sēhe Yāā Dios chindeé chítuu yā nduhū. Chi nī ncundáhvī inī yā nduhū de nī nsōcō yā maá yā jēhē ni.

21Túsaá de nduú cúnī ni casī ni nūū tūhun jā sndáhvā Yāā Dios cuāchi ó sīquī jā vāha ndasí inī yā jín ó. Chi tú jā quéndōo ndāā ō nūū yā jā nducú ó squíncuu ó ley janahán, ñúcuán de nduú nā tiñu cuitī jā ní jīhī Cristo nícu.

Tūhun ley jín tūhun cándíja

3¹Ndá ndóhó hermano región Galacia, ¿nūcu nduú jícūhun inī ndá nú? ¿Ní tēe nī nsacā nuu xīnī nū jāá nduú cā jétáhvī nú tūhun ndāā? Chi tá nī nacani ndá nī tūhun yā nūū nū, de cājī ndasí nī jícūhun inī nū jā ní jīhī Jesucristo yīcā cruz jā jēhē nū.

²Iin-ni tūhun yáhá jīcā tūhún nī ndá nú: ¿Nāsa nī nīhīn nū Espíritu Santo? ¿A jā ní ncundeeé nú squíncuu nú tiñu jā ndácu ley Moisés? Nduú cuitī, chi sa jā ní ncandíja nú tūhun jā scácu yā ndóhó jā ní jini nú.

³¿Nā sīquī cúu jāá nduú jícūhun cuitī inī nū? Chi xihna cā nī ncandíja ndá nú jā ní jīhī Cristo jā scácu yā ndóhó, de nī nīhīn nū Espíritu Santo. ¿De mitan á jáni inī ndá nú jā sndóo tucu nú tūhun ñúcuán de fuerza maá nú squíncuu nú ley de cācu nú, á naá cúu?

⁴Ndasí nī sndóho nchivī ndá nú sīquī tūhun jā scácu Cristo ndóhó. Nācā jā váha de tú nduú ní ndóho cāhá nú, chi sa jā cándíja ndíja nú yā.

⁵¿De nā sīquī cúu jā jéhe Yāā Dios Espíritu yā nū nū de sáhá yā tiñu ñáhnú māhñú nú? Nduú sáhá yā sīquī jā ndúcú ndá nú squíncuu nú ley, chi sa sīquī jā ní ncandíja nú tūhun jā scácu yā ndá nú jā ní jini nú.

⁶Abraham nī ncandíja dē jā sáhá Yāā Dios jā ní nquee yuhú yā, de jā ñúcuán nī sndáhvā yā cuāchi dē.

⁷Túsaá de ná jícūhun inī ndá nú jā nchivī jā cándíja jā sáhá Yāā Dios jēhē ji, ndivī ji nduu ji tatā Abraham sīquī jā súcuán cándíja ji.

⁸Chi jondē janahán ja cáhān tutū īī jā nchivī ndācá nación jāá nduú jínī tūhun Yāā Dios, sndáhvā yā cuāchi ji de tú candíja ji tūhun ñúcuán. De jondē ncháha ca cuu ndācá yáhá de ja nī nquee yuhú yā tūhun vāha yáhá nū Abraham: Jā jín ndóhó de quendōo ndetū nchivī ndācá-ni nación.

⁹Tú súcuán de nchivī cándíja, quéndōo ndetū ji jín Abraham, tēe jā ní ncandíja tūhun jā ní nquee yuhú yā jā sáhá yā.

¹⁰De sa tānū tāhvī nchivī jā ndúcú quendōo ndāā jín ley Moisés. Chi súcuán yósō nū tutū īī: Tānū tāhvī ndācá nchivī jāá nduú squíncuu ndihi cuitī tūhun jā yósō nū tutū ley, cáchi.

¹¹Túsaá de cájí cúu jā ni iin nchivī mā quéndōo ndāā ji nū Yāā Dios sīquī jā ndúcú ji squíncuu ji ley. Chi cáhān tutū: Nchivī jā ní sndáhvā yā cuāchi ji, técu ji jā cándíja ji jā sáhá yā jēhē ji, cáchi.

¹²De ley Moisés nduú cáhān jā cutecū ō ní cánī sīquī jā cándíja ó jā ní nsáhá yā jēhē ō, chi sa cáhān: Tú ní nchivī squíncuu tiñu yáhá, de cutecū ji sáhá, cáchi.

¹³De Cristo nī scácu yā yóhó nū tūhun jā cáhān ley jā tānū tāhvī ō sīquī cuāchi ó, chi maá yā nī ndoho sīquī tūhun jā tānū tāhvī ō. Chi yósō nū tutū īī: Ndācá nchivī jā cundita caa yīcā ñūtún, tānū tāhvī ji, cáchi.

¹⁴De Cristo Jesús nī jīhī yā yīcā ñūtún cruz tácu quendōo ndetū nchivī ndācá nación sáhá yā. Chi tūhun jā ní nquee yuhú Yāā Dios jā quendōo ndetū Abraham, jínū nū ji. De súcuán de tú candíja ó jā ní nsáhá Yāā Dios jēhē ō, de nīhīn ō Espíritu Santo jā ní nquee yuhú yā jā quiji.

Siquī ley jín sīquī contrato jā ní nquee yuhú yā

¹⁵Hermano, ná cáhān ni iin tūhun nāsa sáhá ndá nchivī ñayivī: Tú iin tēe sáhá dē iin contrato á iin acta, de tú ja nī ncucutú jā ní nsáhá dē firmar, de mā cūú cā nacani, de ni mā cūú jēcōsō cā.

¹⁶De suni súcuan nī nsāhá Yāā Dios iin contrato jā ní nquee yuhú yā nūū Abraham jíin tatā dē jā quiji. De nduú cáhān tutū īī sīquī cuāhā tatā dē, chi sa cáhān sīquī iin-ni tatā dē, de suu cúu Cristo.

¹⁷Túsaá de tūhun jā cáhān nī yáhá cúu jā xihna cā nī nsāhá Yāā Dios iin contrato jíin Abraham, suu jā quiji Cristo de scácu yā yóhó, de nī nsāhá cutú yā. Núcuán de nī nchāha cūmī ciento ōcō ūxī cuiyā, de sá de nī jēhe yā ley nūū Moisés. De ley núcuán jā ní nquiji cuéé cā, mā cūú nacanī contrato núcuán, nī mā cūú casī nūū tūhun jā ní nquee yuhú yā jā scácu yā yóhó.

¹⁸Chi tú jā jíin ley Moisés scácu yā nchivī, núcuán de nsūū sīquī contrato jā ní nquee yuhú yā cúu jā scácu yā ji. De nduú chi sa sīquī maá jā ní nquee yuhú yā nūū Abraham cúu jā ní scácu yā dē.

¹⁹¿Túsaá de nāsa jétínú ley Moisés? Jétínú chi nī jēhe yā cuéé cā tácu nastúu cuāchi ji. De nī ndacu tiñu maá-ni tiempo jāá nchāha ca quiji Cristo, Yāā jā cúu tatā jā ní nquee yuhú Yāā Dios jā quiji. De tá nī jēhe Yāā Dios ley núcuán nūū nchivī, de nī ntají yā ndá ángel yā nī ncachī tūhun nūū Moisés, de Moisés nī nacachī nūū ji.

²⁰De sín cúu tūhun jā ní nquee yuhú yā nūū Abraham jā quiji Cristo, chi mátuhún-ni yā nī nquee yuhú nūū dē, de nduú ní jínī núhún nī iin jā cáhān yúnúū yā nūū dē.

Sīquī nāsa jétínú ley janahán

²¹¿Túsaá de á ndihi yáhá cáhān jā ley jā ní jēhe Yāā Dios nūū Moisés, sáhá jíyo jā ní nquee yuhú yā jā sáhá yā? Nduú cuitī jā súcuan. Chi tú ní jēhe Yāā Dios iin ley jā cutecū nchivī ní cání sáhá, núcuán de quendōo ndāā ji nūū yā sīquī jā squíncuu ji tiñu jā ndácu ley nícu.

²²De nduú chi yósō nūū tutū īī jā ndihi nchivī ñayiví, modo jā yíndasī ji vecāa chi yíhī ji chījin cuāchi. De súcuan cúu tácu ndācá ji jā cándíja jā ní jīhī Jesucristo jēhē ji, nīhīn ji maá jā ní nquee yuhú yā nūū ji sīquī jā cándíja ji tūhun núcuán.

²³Chi jondē nchāha ca quenda tūhun jā candíja ó Cristo, de modo jā ní nchindasī ō nī nsāhá ley janahán, tácu cundetu ó quīvī jā quiji Cristo, Yāā jā cándíja ó.

²⁴Túsaá de ley nī ncuu iin jā jíto yóhó modo tá sáhá iin mozo jā jíto sūchí lúli, de nī jetínú jondē nchāha ca quiji Cristo, de sá de candíja ó jā ní jīhī yā jēhē ō, de sndáhvā Yāā Dios cuāchi ó.

²⁵De mitan chi ja nī nquiji Cristo, Yāā jā cándíja ó, de nduú cā yíhī ó ndahá ley jā cúu tá cúu mozo jā jíto yóhó.

²⁶Chi ndiviī nū cúu sēhe Yāā Dios sīquī jā ní ncandíja nú Cristo Jesús.

²⁷Chi ndācá nú jā ní jenduté nú sīquī jā ní nquīvi nú ndahá Cristo, nī nsāhá yā jā ní nduu nú tá cúu nūū cúu maá yā.

²⁸De mitan chi nduú cā cúu nú ni nchivī hebreo ni nchivī griego, ni mozo jā ní jeen nchivī ni nchivī jā sātíñú cuenta maá, ni tēe ni ñahan. Chi iin-ni cā nī nduu ndá nú nū Yāa Dios jā yíhí nú ndahá Cristo Jesús.

²⁹De tú yíhí nú ndahá Cristo, túsaá de tatā Abraham cúu ndija ndá nú, de nīhīn nū maá tāhvī jā ní nquee yuhú yā.

4 ¹Jā cáhān ni jín ndá nú cúu yáhá: Iin sūchí jā xíí táhvī, vísō iin quivī de nīhīn ndihi ji jā névāha tatá ji, sochi tá lulí ji chi inuú-ni cúu ji jín mozo.

²Chi yíhí ji ndahá ndá mozo jā jító ji jín jā jító ndatíñú ji, jondē tá quenda quivī jā ní jani tatá ji, sá de nīhīn ji.

³De saá-ni yóhó, chi jondē ncháha ca jicūhun inī ō sīquī Cristo de nī ncuu ó tá cúu sūchí lulí, de nī nchīhi ó chījin ndācá jā tátúnī inī ñayiví.

⁴De jondē tá nī nquenda quivī jā ní jani Yāa Dios, de nī ntají yā Sēhe yā, nī ncacu yā chījin iin ñahan, de nī ncacu yā nū nchivī hebreo jā yíhí chījin ley Moisés.

⁵Súcuán nī ncacu yā tácu scácu yā yóhó jā má quīhi ó cā chījin ley, de tácu naquehen Yāa Dios yóhó jā cuu ó sēhe yā.

⁶De sīquī jā cúu ndá nú sēhe yā, de nī ntají Yāa Dios Espíritu Sēhe yā jā ní nquivī inī ánō ndá nú, de sáhá yā jā cáhān jee ndá nú: Tatá maá sá.

⁷Tú súcuán de nduú cā cúu ndá nú tá cúu mozo, chi sēhe yā cúu nú. De sīquī jā cúu nú sēhe Yāa Dios, de nīhīn nū maá tāhvī jā ní nquee yuhú yā jā jín Cristo.

Jā nacani inī Pablo sīquī nchivī cándija

⁸Chi jondē saá, jondē tá ncháha ca jicūhun inī nū nāsa Yāa cúu Yāa Dios, de nī ncuu ndá nú mozo nū ndācá jāá nsūú yāa ndāa cúu.

⁹De mitan chi ja jín ndá nú nāsa Yāa cúu yā, á vāha cā cáhān ni jā maá yā ja jín yā ndóhó. ¿Túsaá de nājēhē cúu jā cúnī ndá nú nandicó cóo nú jā nduu tucu nú mozo nū ndācá jā tátúnī inī ñayiví jāá nduú nīhīn tiñú cuitī?

¹⁰Chi maá-ni jā nēe iī ndá nú quivī jín yōō jín vico jín cuiyā.

¹¹De yúhú nī jā sanaa de nduú ní jétíñú cuitī jā ní nacani nī tūhun nū ndá nú.

¹²Cáhān ndāhvī nī jín ndá nú hermano, jā cani inī nū tá cúu nū jāni inī maá nī jā nduú cā squíncuu nī costumbre nchivī hebreo. Chi nduhū nī nasāhá nī maá nī tá cúu ndá máa nú jāá nduú yíhí nú nū ley costumbre nchivī hebreo. De nduú nā cuá ní nsáhá nú jā cucuécá inī ni jondē saá.

¹³Chi jín ndá nú nāsa nī ncuu jā ní nacani nī tūhun jā scácu yā yóhó nū nū jā xíhna ñúhún, chi sīquī jā ní ncuhū ni cúu jā ní jencuiñī ni ñuū nū nī nacani nī tūhun.

¹⁴De vísō tūndóhó nī ncuu jā ní ncuuhū ni, de nduú ní nsáhá jéhe inī ndá nú nūū ni, de ni nduú ní ncúyichī inī nū nduhū. Chi sa nī jetáhvī ndá nú nduhū modo iin ángel Yāā Dios, á modo maá Jesucristo.

¹⁵¿Túsaá de nājēhē cúu jāá nduú cā cúsi inī ndá nú jín nī mitan? Chi náhán nī jā vāha nī nsáhá ndá nú jā ní ntahúhvī inī nū jā cúhū tīnūú nī, de tú jā cuu de jondē tavā nū tīnūú vāha maá nú de taji nú nūcūhun tīnūú nī nícu.

¹⁶De mitan ¿de á nī nduu nī enemigo nū sīquī jā cáchī ni maá-ni tūhun ndāā nūū nū, á naá cúu?

¹⁷De íyó tēe jā ndíhvī inī sīquī ndá nú, sochi nsūú jā quendōo vāha ánō nū, chi sa jā cúnī ndá dē nasáhá sīn dē ndá nú jín nduhū, tácu cundihvī inī nū jā cúu maá dē.

¹⁸De íyó vāha tú ndíhvī inī dē jēhē ndá nú, de tú jā quendōo vāha ánō nū cúu. Chi níní cánuú jā sáhá dē jā vāha ndá nú nícu, vísō ndēē ni jín nú á nduú nī.

¹⁹Ndá ndóhó sēhe mánī, jā sīquī ndá nú cúu jā táhúhvī ndasí tucu inī ni, chi tá cúu iin ñahan jā scácu sēhe, súcuan ndóho nī jā jēhē nū. De suu cúu jā táhúhvī inī ni ndétu nī jondē ná ndúndaā ánō nū jā ndacu nú Cristo.

²⁰Nācā jā vāha de tú jā íyó nī jín nú mitan ñúhún, tácu cuu cāhān mánī ni jín nú. De nduú cúcáhnú cuiti cā inī ni nāsa canī inī ni sīquī ndá nú.

Tūhun yátá sīquī Agar jín Sara

²¹Ndá ndóhó jā cúnī nū quihi nú chíjin ley Moisés, cachī nūū ni: ¿A nduú ní jínī ndá nú nāsa cāhān ley ñúcuán?

²²Chi cāhān tutū īi jā Abraham nī īyo ūū sēhe yíí dē. De iin ji cúu sēhe Agar, ñahan cúu mozo vehe dē. De incā ji cúu sēhe ñahan íyó libre, suu ñasíhí dē Sara jā ní ncuu ña ñahan númā.

²³De sēhe ñahan cúu mozo, nī ncacu ji tá cúu nūū cácu ndá cā sūchí lúlí. De sēhe ñahan íyó libre, nī ncacu ji sīquī jā súcuan nī nquee yuhú Yāā Dios.

²⁴De yáhá cúu iin tūhun yátá, chi ndúū ñahan ñúcuán cúu ña modo ndúū contrato jā ní nsáhá Yāā Dios jín nchivī. Maá ñahan nání Agar, cúu ña tá cúu contrato ley jā váji jondē yucu Sinaí. De nchivī jā yíhí chíjin contrato ley, cúu ji mozo nūū ley ñúcuán.

²⁵Chi Agar cúu tá cúu ley jā ní jēhe Yāā Dios xīnī yucu Sinaí jā íyó jondē Arabia. De cúu ña modo Jerusalén, ciudad nchivī hebreo, jā íyó mitan, chi ndācá sēhe Jerusalén cúu ji mozo nūū ley ñúcuán.

²⁶Sochi maá Jerusalén jā íyó andiví, chi sa íyó libre tá cúu nūū cúu Sara. De yóhó nchivī jā cándíja, modo sēhe ñúcuán cúu ndācá ó, chi íyó libre ndācá ó nūū contrato ley.

²⁷Chi súcuan yósō nūū tutū īi:

Ndóhó jā ní ncuu nú ñahan númā jāá nduú sēhe nú, ná cúsiī inī nū.
Ndóhó jāá nduú ní ntéhdē chijin nú jā scácu nú, ná cána jee nú jā
cúsiī inī nū.

Chi coo cuāhā cā sēhe ndóhó jā ní ncuu nú ñahan númā nsūú cā
ñahan jā ní scácu sēhe.

Cáchī tutū.

28 Hermano, sēhe Yāā Dios cúu ó, chi súcuán nī nquee yuhú yā nūū ō, tá
cúu nūū ní nquee yuhú yā nūū Abraham jā coo sēhe dē Isaac.

29 De jondē saá de incā sūchí jā ní ncacu tá cúu nūū cácu ndá cā nchivī, nī
jinī ūhvī ji Isaac, sūchí jā ní ncacu nī nsāhá Espíritu Santo. De tá cúu nūū
ní iyo saá, suni súcuán jinī ūhvī nchivī ndá sēhe Yāā Dios jondē mitan.

30 ¿Sochi nāsa cáhān tutū īī? Tavā nū ñahan cúu mozo ná quíhīn ña jín
sēhe ña. Chi sēhe ñahan cúu mozo, mā níhīn ji tāhvī ji nūū sēhe ñahan
libre, ncachī yā jín Abraham.

31 Túsaá, hermano, nduú cúu ó tá cúu sēhe ñahan cúu mozo, chi tá cúu
sēhe ñahan libre cúu ó.

Ná cuiñi nihin ó jín tūhun jā ní nsāhá libre yā yóhó

5 ¹De Cristo nī nsāhá libre yā yóhó jāá nduú cā yíhí ó chíjin ley Moisés.
Túsaá de cuiñi nihin ndá nú jín tūhun jā ní nsāhá libre yā yóhó, de
mā ndívi tucu nú cuu nú mozo nūū ley.

²Sāhá ndá nú cuenta, chi nduhū Pablo cáhān nī jín nú jā tú squíncuu nú
ley circuncidar, ñúcuán de nduú níhīn tiñú cuitī jā ní ncandíja nú jā ní jīhī
Cristo jēhē nū.

³De incā vuelta cáhān nihin nī jín ndá tēe jā ndúcú cuu circuncidar, jā
tú súcuán de suni cánuú jā squíncuu dē ndivī cuitī cā tūhun jā cáhān ley
Moisés.

⁴Ndá ndóhó jā ndúcú nú quendōo ndāā nū jā squíncuu nú ley, túsaá de ja nī
nsiāā nū Cristo. Ja nī sndóo nú tūhun jā ní sndáhvā yā cuāchi nú sīquī jā ní
ncundáhvī inī Yāā Dios ndóhó.

⁵Sochi maá ó chi jica ó jín Espíritu Santo, de cándíja ó jā ní sndáhvā Yāā
Dios cuāchi ó, de jā ñúcuán ñúhún inī ō jā quendōo ndāā ō quīvī jā cuiñi ó
nūū yā.

⁶Chi ndācá ó jā yíhí ó ndahá Cristo Jesús, vísō tú cúu ó circuncidar á nduú,
de nduú nā cuá níhīn tiñú. Jā níhīn tiñú cúu jā candíja ó jā sáhā yā jēhē ō.
De ñúcuán sáhā jā cundáhvī inī ō táhán ó.

⁷Vāha nī ncandíja ndá nú nícu. ¿De ní iin nī jasī jāá nduú cā jétáhvī nú
tūhun ndāā túsaá?

⁸Tūhun jā ní scáhān ndá dē ndóhó, chi nduú vāji nūū maá Yāā jā ní ncana
ndá ndóhó jā ní nquīvi nú ndahá yā.

⁹De mā náā inī ndá nú jā ndá tēe jā stáhvī ndóhó, tūhun jā stéhēn dē cúu tá cúu levadura, chi vísō jacū-ni levadura, de ndāa ndihi ñujan sáhá.

¹⁰Sochi cúcáhnú inī ni jā maá Jētohō ō sáhá yā jā má cándíja ndá nú incā tūhun jā sín cáhān. De maá Yāa Dios cuāha yā castigo ndá tēe jā sácā nuu xīnī nū, tú nā-ni tēe cúu dē.

¹¹De nduhū, hermano, tú jā nácani cā ni tūhun jā cánuú sáhá circuncidar jondē mitan, de ndá táhān nī nchivī hebreo mā sáhá nāvāha ji nduhū nīcu. Chi mā quítī inī ji jā nácani nī tūhun jā ní jihī Cristo yīcā cruz, de tú suni nácani nī tūhun jā cánuú sáhá circuncidar nīcu.

¹²De ndācá tēe jā sácā nuu xīnī nū sīquī tūhun ñúcuán, vāha cā ná quéhndē cā dē maá dē túsaá.

¹³Chi ndá máá nú, hermano, nī ncana yā ndá nú tácu coo libre nū nū ley ñúcuán. De vísō íyó libre ndá nú, de mā cānī inī nū jā cuu quīvi nú ndācá cuāchi jā cúu modo nēhén jā cúnī maá nú, chi sa sáhá nú maá nú mozo jā chindeé nú táhān nú sīquī jā cúndáhvī inī nū ji.

¹⁴Chi ja nī squíncuu nú ndihi ley de tú squíncuu nú iin-ni tūhun jā ndācu tiñu yáhá: Cúndáhvī inī nū táhān nú tá cúu nū cúndáhvī inī nū maá nú, cáchi.

¹⁵Sochi tú maá-ni jā nénda nú sīquī táhān nú jā cánāá nú, túsaá de coto má sáhá cā nū súcuan, chi súcuan de snāā tāhān ndá nú.

Modo jā cúnī nchivī jāá nduú cándíja jíin modo jā sáhá Espíritu

¹⁶Súcuan cáhān ni jíin ndá nú: Caca nú tá cúu nū cúnī maá Espíritu Santo, de ñúcuán de mā sáhá cā nū modo jā cúnī maá nú.

¹⁷Chi ndācá jā cúnī maá ó, ñúcuán jāsī jā cúnī maá Espíritu. De jā cúnī Espíritu, suu jāsī nū modo nēhén jā cúnī maá ó. De jā ndúu yáhá chi jāsī nū tāhān, de jā ñúcuán nduú cúu sáhá nú tiñu váha jā cúnī nū sáhá nú.

¹⁸Sochi tú maá Espíritu stéhēn nū nū, túsaá de nduú cā yíhī nú chijin ley janahán.

¹⁹De íyó nijīn ndācá tiñu jā sáhá nchivī jā jíca jíin modo nēhén maá, de yáhá cúu: Cásíquí ndēē tāhān ji, sáhá ji tiñu téhén, sáhá nēhén ndasí ji,

²⁰chíñúhún ji ídolo, sáhá tásí ji, quítī inī ji nū tāhān ji, cánāá ji, cúcuíñú inī ji. De ñamā quítī inī ji, de ndíhvī inī ji jā cúu maá ji-ni, de tétáhān ji sáhá sín ji maá ji.

²¹De cúcuásún inī ji, jáhnī ji ndiyi, jíni ji, sáhá ji vico nēhén, jíin ndá cā jā súcuan. De cáhān nīhin nī jíin ndá nú, tá cúu nū ja nī ncāhān ni jíin nú saá, jā nchivī jā sáhá súcuan, mā níhīn táhvī ji quīvi ji ñuū nū tátúnī Yāa Dios.

²²Sochi nchivī jā jíca jíin maá Espíritu Santo, ndācá tiñu yáhá sáhá yā jíin ji: Cúndáhvī inī ji táhān ji, cúsi inī ji, íyó ndeé íyó sī inī ji, íyó paciencia ji, mānī inī ji, vāha inī ji, squíncuu vāha ji,

²³nduú sáhá ji jā cúñáhnú ji, de jásī ji jā cúnī maá ji. De nduú nā ley íyó jā cāhān cuāchi sīquī nū de tú sáhá nú ndācá tiñu yáhá.

²⁴De nchivī jā yíhí ndahá Cristo, chi tá cúu jā ní jahnī ji modo nēhén maá ji yīcā cruz, jondē jíin ndācá jā nēhén jā ndíyo inī ji de cútíndí ji.

²⁵De jā súcuán nī jēhe maá Espíritu iin vida jeé nūū ō, de suni ná cáca ó jíin modo jā stéhēn Espíritu.

²⁶De mā cúnduxí ó jā squítī inī ō táhán ó, de ni mā cúcuásún inī ō sīquī táhán ó.

Tūhun jā chindeé táhán ó

6 ¹Hermano, tú iin táhán nú nī nsáhá cuāchi, de ndá ndóhó jā jíca jíin Espíritu Santo nachuhun ichí nú ji. De jíin tūhun vitá cāhān ndá nú jíin ji, de suni coto nú maá nú jā má sáhá jíin nú jā quīvi nú cuāchi.

²De chindeé nú ndá táhán nú tú nā cuá cúu jā ndóho ji, chi súcuán cúu jā squíncuu nú ley Cristo.

³Chi tú iin nchivī jáni inī ji jā nchivī vāha cā cúu ji, vísō nsūú súcuán cúu, de stáhvī ji maá ji túsaá.

⁴De tá iin iin nú coto túnī nū nāsa cáá tiñu sáhá nú. De tú vāha sáhá nú, ñúcuán de cuu cusī inī nū jíin jā sáhá maá nú, de nduú níní scāni táhán nú maá nú jíin táhán nú.

⁵Chi tá iin iin ó cánuú jā squíncuu ó jíin tiñu jā ní jēhe yā nūū maá ó.

⁶De ndá ndóhó jā scuáha tūhun vāha yā, chindeé nú ndá tēe jā stéhēn nūū nū jíin ndācá jā vāha jā névāha nú.

⁷Mā stívī nú jā canī inī nū jā cuu sáhá nú cuāchi. Chi mā cūú sáhá catá nú nūū Yāa Dios jā canī inī nū jāá nduú sáhá yā cuenta. Chi ndācá tú nāsa sáhá nchivī, suu ñúcuán nanihīn ji.

⁸Chi nchivī jā sáhá jā cúnī modo nēhén maá ji, nanihīn ji jā tānū tāhvī ji sáhá modo nēhén maá ji. Sochi nchivī jā sáhá jā cúnī maá Espíritu Santo, chi nanihīn ji jā cutecū ji ní cánī andiví sáhá Espíritu.

⁹De mā cuítá ó jā sáhá ó ndá tiñu vāha túsaá, chi tá quenda maá quīvi de nanihīn ō, de tú mā cuítá ó.

¹⁰Túsaá de ndācá vuelta jā cuu sáhá ó, de ná sáhá vāha ó jíin ndācá nchivī, de ndá hermano ō jā cándíja cúu jā cánuú cā.

Saludo jíin tūhun jā cáchi tūhun Pablo jā sándihí

¹¹Cūndēhé ndá nú jā náhnú letra tēe nī cuēē nūū ndá nú, chi ndahá maá nī tēe nī yáhá.

¹²De ndá tēe jā sáhá fuerza dē ndá nú jā cuu nú circuncidar, sáhá dē sīquī jā cúnī dē jā cuetúhún nchivī dē. De sáhá dē tácuā mā cúnī ūhvī nchivī dē jā nácani dē tūhun jā ní jīhī Cristo jēhē ō.

¹³De ni maá dē jā sáhá dē circuncidar, suni nduú squíncuu vāha dē ndihi cā ley janahán. De cúnī dē jā cuu ndá nú circuncidar, tácuu cuu sáhá téyíí dē maá dē jā quehen nú tunī circuncidar sáhá dē.

¹⁴Sochi nduhū chi nduú cúnī ni sáhá téyíí nī maá nī sīquī ni iin ñúcuán, chi mátúhún-ni sīquī jā ní jīhī Jētohō ō Jesucristo yīcā cruz. Chi sīquī ñúcuán cúu modo jā ní jīhī ni, chi nī nsiáā ni ndācá jā íyó inī ñayiví, de suni modo iin ndiyi cúu nī nūū ñayiví.

¹⁵Chi tú yíhí ó ndahá Cristo Jesús, de nduú níhīn tīñú á cúu ó circuncidar á nduú. Chi jā níhīn tīñú cúu jā ní nsáhá jeé yā ánō ō.

¹⁶De ñúhún inī ni jā ndācá nú jā jíca jíín modo yáhá, ná sáhá cā yā jā coo ndeé coo siī inī nū, de cundáhvī inī yā ndóhó. De suni ñúhún inī ni jā súcuán sáhá yā jíín ndá cā ji jā cúu ndija ji nchivī jā cándíja Yāā Dios.

¹⁷De mitan jíín níí cā jā cuáhān ō, cúnī ni jā má stáhān cā ni iin nchivī nduhū. Chi yiqui cúñu nī ndíso seña jā ní ntacuēhé nī nī ndoho nī jā cúu nī mozo maá Jētohō ō Jesús.

¹⁸Hermano, ñúhún inī ni jā ná sáhá cā Jētohō ō Jesucristo jā váha ndá ndóhó. Súcuán ná cóo. Amén.